



KERATAN AKHBAR DAN MEDIA ONLINE UNTUK MAKLUMAN :

**Y.B. MENTERI
Y.B. TIMBALAN MENTERI
Y.BHG. KSU
Y.BHG. TKSU (PDN)
Y.BHG. TKSU (PUP)
SETIAUSAHA AKHBAR**

6 APRIL 2021 (SELASA)



KEMENTERIAN PERDAGANGAN DALAM NEGERI
DAN HAL EHRAH PENGGUNA

KERATAN AKHBAR DAN MEDIA ONLINE (KPDNHEP)

6 APRIL 2021 (SELASA)

Bakal laksana teknologi retort

KPDNHEP telah menempah dua buah mesin berharga RM70,000 bagi laksana projek rintis itu

Oleh RAIHAM MOHD SANUSI

KUALA LUMPUR

Kementerian Perdagangan Dalam Negeri dan Hal Ehwal Pengguna (KPDNHEP) akan melaksanakan projek rintis teknologi 'retort' dalam masa terdekat dan telah menempah dua buah mesin berharga RM70,000.

Menterinya, Datuk Seri Alexander Nanta Linggi berkata, pelaksanaan inisiatif itu akan menyelamatkan dan meningkatkan jangka hayat lebih makanan iaitu yang masih baik dan belum disentuh daripada industri perhotelan dan katering daripada terus dibazirkan.

"Projek rintis ini akan



Alexander (dua dari kiri) membuat tinjauan di Food Pantry Cabin selepas melancarkan program Food Bank Siswa di UniKL BMI, Gombak pada Isnin.

dilaksanakan di Hotel Seri Malaysia, Perlis dan Hotel Primula, Terengganu sebelum diperluaskan lagi.

"Oleh itu, kita sarankan lebih banyak hotel tampil mengambil bahagian dalam inisiatif ini kerana kita tahu banyak lebih makanan yang boleh dimanfaatkan nanti," katanya selepas menyempurnakan Majlis Pelancaran Foodbank Siswa Universiti Kuala Lumpur British Malaysian Institute (UniKL

BMI) di sini pada Isnin.

Mengulas lanjut, Alexander berkata, projek rintis itu dijalankan di bawah program Food Bank Malaysia yang diperkenalkan sejak tahun 2018 sebelum diperluaskan kepada golongan mahasiswa menerusi program Food Bank Siswa pada tahun 2019.

Katanya, program Food Bank Malaysia menjadi platform membentuk semangat dan budaya kesukarelawan dalam kalangan rakyat untuk

membantu golongan yang memerlukan dan mengelakkan pembaziran makanan.

Alexander berkata, dengan pelancaran program Food Bank Siswa itu, UniKL BMI muncul sebagai institusi pengajian tinggi (IPT) swasta pertama melaksanakan program tersebut di negara ini.

"Sebelum ini ia hanya dilancarkan di IPT awam, sekali gus menjadikan UniKL BMI sebagai IPT yang ke-26 melaksanakan program ini," katanya.

Menurutnya, pelaksanaan Program Food Bank Siswa itu menggunakan konsep Food Pantry Cabin di mana pihak Hal Ehwal Pelajar UniKL BMI menyediakan tempat penyimpanan makanan kering untuk diagihkan kepada pelajar mengikut jadual ditetapkan.

"Secara keseluruhannya sejak program Food Bank Siswa dijalankan pada tahun 2019 hingga Mac lalu, seramai 17,754 mahasiswa telah mendapat manfaat daripada program ini, yang telah dilaksanakan di 25 buah IPT seluruh negara," katanya.

Minyak masak subsidi tiris angkara pengedar, pemborong, pembungkus

Pakatan seleweng

Oleh **NURAINA HANIS**

ABD.HALIM

hanis.halim@mediamalaysia.com.my

PETALING JAYA: Kementerian Perdagangan Dalam Negeri dan Hal Ehwal Pengguna (KPDNHEP) mendedahkan pakatan jahat antara pengedar, pemborong dan pembungkus minyak masak menyeleweng subsidi bernilai kira-kira RM50 juta yang diberikan kerajaan setiap bulan.

Mendedahkan kepada *Utusan Malaysia*, Pengarah Penguat Kuasa KPDNHEP, Azman Adam berkata, itu adalah punca yang dikesan berlaku dalam kalangan pihak industri sehingga menyebabkan ketirisan barang kawalan dan merugikan kerajaan.

“Kita tidak nafikan perkara itu ada berlaku. Setakat ini kita dapati punca kerana pakatan daripada pihak industri dipercayai melibatkan pengedar, pembo-

rong dan kemungkinan pembungkus itu sendiri,” kata beliau ketika ditemui semalam.

Azman memberitahu, ketirisan berkaitan minyak masak bersubsidi itu juga dibuktikan apabila pihaknya menerima maklumat bahawa barang tersebut pernah dijumpai di negara jiran.

“Penyelewengan minyak subsidi itu juga berlaku dengan cara pemain industri memasuk-

kan minyak bersubsidi polibeg satu kilogram (kg) ke dalam botol untuk dijual ke pihak industri dengan harga lebih daripada RM2.50 sekilogram,” katanya.

Menurut Azman, dalam tempoh tiga tahun ini, kira-kira RM13.69 juta melibatkan 273,663 kg minyak masak bersubsidi yang cuba diseleweng berjaya dirampas oleh KPDNHEP.

Bersambung di muka 2

Pakatan seleweng

Dari muka 1

Jelasnya, rampasan itu melibatkan RM12.88 juta (33,046 kg) pada tahun 2019 manakala RM651,654 (211,20 kg) untuk tahun lalu serta 29,410kg minyak masak bernilai RM159,126 untuk tempoh empat bulan tahun ini.

Ujar beliau, pihaknya telah mengambil beberapa tindakan terhadap pihak-pihak yang terlibat dalam pakatan jahat tersebut tetapi permainan 'kotor' terus berlaku.

"Setakat ini, sebanyak 14 syarikat pembungkus sudah diambil tindakan untuk tahun lalu. Selain itu, tiga syarikat menerima kuota minyak masak ditarik lesen di bawah Skim Penstabilan Harga Minyak Masak (COSS) untuk 2020 dan 2021 manakala tiga lagi digantung lesen pada 2019 dan tahun lalu," kata beliau.

Selain itu, Azman berkata, siasatan pihaknya juga mendapati keuntungan berlipat ganda menjadi tarikan minyak masak bersubsidi diseludup ke negara jiran.

"Harga minyak di sini dijual dengan harga RM2.50 sebungkus bagi pek berat sekilogram namun jika di negara jiran ia mencecah RM4.50, itu menyebabkan ada pihak-pihak sanggup berpakat dan sama-sama ambil kesempatan.

"Buat tuntutan subsidi daripada kerajaan dan dalam masa sama dapat lagi keuntungan berganda jual dengan harga lebih mahal," ujarinya.

Dalam pada itu, Azman mengakui pihaknya ada menerima aduan mengenai bekalan



Buat tuntutan subsidi daripada kerajaan dan dalam masa sama dapat lagi keuntungan berganda jual dengan harga lebih mahal."

AZMAN ADAM



Rampasan minyak masak bersubsidi oleh KPDNHEP

DARI 2019 - APRIL 2021

Tahun	Kuantiti (kilogram)	Nilai rampasan (RM)
2019	33,046	RM12,885,861
2020	211,207	RM651,654
2021	29,410	RM 159,126

minyak masak bersubsidi yang kurang namun perkara itu bukan bersifat kekal.

Ujar beliau, kekurangan minyak masak bersubsidi disebabkan kenaikan minyak masak yang dijual dalam botol sehingga mendesak pengguna memilih bekalan bersubsidi.

"Ada sedikit aduan tetapi disebabkan pelbagai faktor contohnya cuti sekolah atau bekalan sepatutnya tiba pada Jumaat namun terlewat ke hari Ahad.

"Bagaimanapun, pihak-pihak dalam industri tahu peranan masing-masing dalam memastikan bekalan sampai

kepada pengguna," ujarinya.

Mengulas lanjut, Azman berkata, pihaknya sentiasa menjalankan risikan bagi memberantas aktiviti ketirisan barang-barang bersubsidi.

Katanya, KPDNHEP juga bekerjasama dengan Suruhanjaya Pencegahan Rasuah Malaysia (SPRM) dalam menangani isu tersebut.

"Kita bersama-sama SPRM membangunkan kaedah yang sesuai untuk menyelamatkan wang negara selain memanggil pegawai-pegawai agensi itu untuk turut serta dalam operasi dijalankan KPDNHEP," katanya.

Masih ramai peniaga ingkar arahan

Beri alasan lapuk ketika operasi KPDNHEP

Oleh MUHAMMAD AFHAM RAMLI

SHAH ALAM

Beberapa peniaga di Pasar Awam Moden Seksyen 25 di sini memberi alasan lapuk iaitu tidak sempat meletakkan tanda harga dan tidak tahu berkenaan penandaan harga bagi mengelakkan tindakan dalam operasi di sini pada Ahad.

Alasan itu diberikan ketika Operasi Bersepadu Kementerian Perdagangan Dalam Negeri dan Hal Ehwal Pengguna (KPDNHEP) bersama Majlis Bandaraya Shah Alam (MBSA).

Pengarah KPDNHEP Selangor, Muhamad Zikril Azan Abdullah berkata, operasi bermula jam 9 pagi mensasarkan peniaga sayuran, ikan, daging serta barangan kering membabitkan 74 premis.

"Hasil pemeriksaan mendapati tiga peniaga gagal meletakkan tanda harga dan dikenakan tindakan kompaun atas kesalahan terbabit.

"Alasan tidak sempat meletakkan



KPDNHEP Selangor menjalankan Operasi Bersepadu bersama MBSA di Pasar Awam Moden Seksyen 25 Shah Alam pada Ahad bagi memastikan tahap penandaan harga, penggunaan alat timbangan, kebersihan dan lesen perniagaan.

tanda harga kerana baru mula berniaga dan ada yang berpura-pura tidak tahu bahawa penandaan harga barangan wajib bagi setiap peniaga," katanya dalam satu kenyataan pada Isnin.

Beliau berkata, KPDNHEP tidak berkompromi dengan peniaga yang culas terhadap isu penandaan harga ini.

Menurutnya, selain itu penggunaan alat timbangan oleh peniaga juga diperiksa dan diteliti supaya sentiasa

tepat bagi setiap barangan yang dibeli oleh pengguna.

Muhamad Zikril Azan turut mengingatkan tindakan tegas akan diambil terhadap peniaga yang gagal mematuhi peraturan di bawah Akta Kawalan Harga dan Antipencatutan 2011 dan Akta Timbang dan Sukat.

KPDNHEP juga menyeru orang awam menyalurkan aduan berkaitan isu berkaitan kepada pihaknya untuk tindakan lanjut.

KPDNHEP terima aduan ejen ganggu pembeli

ALOR SETAR – Kementerian Perdagangan Dalam Negeri dan Hal Ehwal Pengguna (KPDNHEP) Kedah menerima enam aduan berkaitan ejen mengutip hutang yang mengganggu pembeli sejak awal Januari hingga 31 Mac lalu.

Ketua Pegawai Penguat Kuasanya, Mohd. Shahrin Mohd. Arshad berkata, enam laporan tersebut melibatkan perjanjian sewa beli antara pembeli dengan syarikat menjual motosikal.

Beliau berkata, berdasarkan aduan tersebut, pihaknya akan memanggil pengadu untuk mendapatkan butiran lengkap sebelum berjumpa dengan pemilik kedai motor terlibat.

"Kita akan siasat aduan itu mengikut perjanjian jual beli di bawah Akta Sewa Beli Pindaan 2010," katanya ketika dihubungi di sini semalam.

Jelasnya, bagi isu ejen pemungut hutang itu, pihaknya juga akan menyiasat sama ada ejen berkenaan adalah pemungut hutang yang sah atau tidak.

"Kita akan buat siasatan sama ada ejen yang dilantik atau sebaliknya dan siasatan akan dibuat di bawah Seksyen



KERATAN Kosmo! kelmarin.

36b akta sama," ujarnya.

Tambahnya, pengguna yang mempunyai masalah sama boleh tampil membuat aduan di pejabat KPDNHEP dan pihaknya akan meneliti keseluruhan perjanjian antara kedua-dua belah pihak.

"Dalam hal ini kita perlu teliti perjanjian yang dibuat terlebih dahulu dan merujuk kepada Akta Sewa Beli sebelum sebarang tindakan boleh diambil," ujarnya.

Kosmo! kelmarin melaporkan tindakan syarikat barangan elektrik, perabot dan kenderaan yang bertindak melantik ejen pengutip hutang untuk mendapatkan bayaran bulan tertunggak selain turut mengenakan pelbagai caj tambahan yang membebankan pembeli.



Senarai Harga Barang Keperluan